



SIPA uhapsila pet osoba zbog porezne utaje

Oštetili budžet za više stotina hiljada maraka

Nezvanično, uhapšen Adin Subašić, koji je rukovodio grupom



Uhapšeni sprovedeni u prostorije SIPA-e
(Foto: SIPA)

Postupajući po naredbama Suda i Tužilaštva BiH, policijski službenici Državne agencije za istrage i zaštitu (SIPA) jučer su u operativnoj akciji „Džoker“ uhapsili pet osoba zbog organiziranog kriminala.

Slobode su lišeni A. S., A. S., D. Ž. Š., D. T. i I. M. zbog postojanja osnovanog sumnje da su počinili krivično djelo organiziranog kriminala u vezi s krivičnim djelima:

carinska prevara, krijumčarenje, porezna utaja ili prevara, primanje dara ili drugih oblika koristi, davanje dara ili drugih oblika koristi, protivzakonito posredovanje i zloupotreba položaja ili ovlaštenja i dr.

Članovi organizirane kriminalne grupe sumnjiče se da su, djelujući od 2012. do 2014. godine, prilikom kontejnerskog uvoza tekstilne i druge robe iz Kine u BiH počinili više krivičnih djela vezanih uz carinske i porezne utaje, čime je budžet BiH oštećen za više stotina hiljada KM. Nezvanično saznajemo da je među uhapšenima Adin Subašić,

kojeg istražitelji smatraju ključnom osobom koja je rukovodila ovom grupom.

Policijski službenici jučer su pretresli ukupno devet lokacija na području Sarajeva, Istočnog Sarajeva i Čelince radi pronalazjenja predmeta koji mogu poslužiti kao dokaz u daljnjem postupku. Aktivnosti su realizirane u saradnji s pripadnicima Uprave za indirektno oporezivanje, Granične policije, MUP-a KS i RS. Uhapšene osobe privedene su u službene prostorije SIPA-e, nakon čega će biti predate na daljnje postupanje Tužilaštvu BiH.

M. Aš.